

[Augsburg], 8. Mai 1554

An Johannes Oporinus

UB Basel, Fr. Gr. I 11; fol. 184r-v.  
Steinmann Nr. 678.

S. P. D. Fasciculus librorum hero meo abs te missus habuit Commentarios Lazij, Arrianum, Somnium Lutheri, Riuij 2 opuscula, Organum, Typos Linacri, Lehenrecht Zasij, Panonium, Eusebium captuum, Ethicae compendium, Neandri tabulas. Biblia verò Castalionis et Chronologiam Functij non addita inueni. Meus fasciculus habuit Arrianum, Somnium, Riuij 2 opuscula, Ethicae compendium et Pannonium, de quibus magnam habeo gratiam. Incommodis officinae tuae doleo. Etsi enim subacerbas literas aliquando, vt tu putas, ad te mitto, meus tamen animus nihil habet acerbi, sed ita est erga te affectus, vt amicum decere existimo. Nisi enim amicitiae fiderem et consultum vellem, minus ac verecundius scriberem, et audacius ea agerem, quae è re mea essent. Nûv δὲ τοῖς μὲν ρήμασι πλέον ἔχω, τοῖς δὲ πράγμασιν ἔλαττον ἦ μηδὲν. Quid enim mihi pollicear, cum Anatomia Vesalij hanc aestatem occupatura sit? Vnde fiet, vt quo tempore absolutum esse Demosthenem conueniebat, nondum sit inchoatus. cum quidem, ne vel sumptibus grauareris, vel cum incommodo tuo, vni ei operi vacares, vltò concesserim, si velles, vt solam conuersionem Aeschinis et Demosthenis meam, sine graeco et Vlpiano, quauis charta et charactere tuo arbitratu excuderes. Neque verò plus sumptuum aut temporis hi 2 oratores requirunt, quam Chronologia Functij παρέργως a te excusa. et spero non minus fore vendibiles, si latini duntaxat, forma octaua paulò maiore, atque eleganti charactere fuerint editi. Nam etsi graeca vnà cum Vlpiano adjici, magis è re studiosorum esset, tamen tibi rationem sumptuum esse habendam, intelligo, et facilius distrahuntur libri qui minoris veneunt. In eo igitur id sequēris, quod è re tua erit, et fac aliquando specimen Demosthenis videam aut saltem consilium tuum intelligam. Nam pro forma libri, etiam orationes quaedam collocandae, et plures fortasse praefationes addendae erunt, quas iam confectas habeo, licet incerta editionis alea. Vale cum tuis. 8 Maij Anno 1554.

Hieronymus Wolfius.

Misi ad te schedam ante Nundinas, et heri mei nomine rogaui, vt, si posses, eos libros huc mitteres. sed responsum ea de re nullum accepi. Itaque peto, vt saltem schedam remittas, si fortè alijs in locis parari possint. Vale.